



Fasnacht 2022

## Vereinigte Kleinbasler 1884 Stammverein

---

### Laine los!

Mir leen is d Fasnacht nimme näh!  
S het s letscht Jahr scho so Stimme gäh.  
Au mir hän gfunde, nundefahne,  
wo fiehrt am Schluss im Grund das aane.  
Scho zwai Jahr uff em Droggedogg.  
Kai Fasnacht, schloosch dr Bogg, e Schogg.  
E Virus, wo kai Gspass verstoht  
und wo aim s Lache grass vergoht,  
isch tschuld, dass nyt meh isch wie gwohnt  
und zeigt, dass Lychtsinn sich nie lohnt.  
S letscht Jahr hesch gmaint, s syg gly verby,  
denn s kennt jo kuum no myyser sy.  
Wo d'BAZ schrybt, dass s e Fasnacht git,  
do freyt sich jede, ych mach mit.  
Im 22 lehn mir s grache  
und ganz verruggti Sache mache.  
Doch laider vorhär isch s bassiert,  
dass s Virus wider frisch grassiert.  
Me wird närvees, nit numme do,  
denn wältwyt isch es drum e so.  
D Fallzahlen explodierte stail,  
statt impfe proteschiert e Dail  
und dien bis zer Extase schimpfe,  
und wel s nit gail syg, d Nase rimpfe.  
Die Maischte finden impfe guet,  
hän uff die Ungimpften e Wuet.  
Me haut und glopft sich stundelang  
und lägg sich alli Wunde lang.  
Au d Bolizei blybt nit verschont  
glopft aber trozdam mit, betont,  
verhaftet Lyt, nimmt alli mit,  
wel s morn s glych Halli-Galli git.  
Das Jahr kunnt denn als näggschte Schlag,  
ein, dass me kuum meh tägsgschte mag:  
Me sait dr Cortège ab – dr Grund?  
Es syg ganz aifach z wenig gsund.  
Was isch denn mit em Morgestraich?  
Frogt mängge sich voll Sorge blaich.  
Das ka doch au nit gsinder sy,  
wenn s dumm lauft, laufsch nit minder dry.  
Was blybt denn, s findet s kain famos,  
mir warte no mit Laine los  
bis d waisch es findet ebbis statt,  
so langsam hän s denn d Bebbi satt.  
Au mir fallt s Zeedeldichte schwäär,  
y bi vom Zigg-Zagg-Kurs ganz läär.  
S isch fertig Schluss, mir isch s egal,  
so Fasnacht mache isch e Qual.

Buebe und Maitli ab em 7. Altersjahr könne in dr Pfyffer- und Drummelschuel vo dr VKB gratis e halb Jahr go schnubbere. Dr VKB-Käller isch an dr Clarastroos 57. Aamälde ka me sich unter: [www.vkb.ch](http://www.vkb.ch) oder über [jungi@vkb.ch](mailto:jungi@vkb.ch).

Übrigens: Cliqueluft schnubbere kasch au am Samschdig, 19. Merz ab de 10i am Morge an verschiedene Ort im Glai Basel:  
#AuFürDi – Drummle und Pfyffe im Glai Basel.  
E Aggtion vo Glai basler Clique.